

16 OCT 1997

Belanjawan-Mahathir

DR MAHATHIR YAKIN BELANJAWAN '98 DAPAT TARIK PELABUR TULEN

KUALA LUMPUR, 17 Okt (Bernama) -- Perdana Menteri Datuk Seri Dr Mahathir Mohamad yakin bahawa Belanjawan 1998 akan dapat menarik pelabur tulen di negara ini.

"Belanjawan kali ini tidak akan menjejaskan pelabur tulen terutama pelabur yang mendirikan kilang, mengeluarkan barangan dan mengadakan perniagaan di negara ini," katanya kepada pemberita di ruang legar Parlimen selepas pembentangan Belanjawan 1998 oleh Timbalan Perdana Menteri dan Menteri Kewangan Datuk Seri Anwar Ibrahim hari ini.

Katanya mereka yang tidak puashati (dengan belanjawan) ialah mereka yang berniaga wang.

"Mereka ini beli duit. Kadang-kadang mereka beli saham dan belipun tidak kekal. Mereka beli saham dengan harapan saham itu meningkat. Lepas itu bila saham naik, mereka ambil keuntungan dan pergi ke negara lain," katanya.

Pada persidangan berita kira-kira 20 minit itu, Dr Mahathir yang kelihatan masih kurang sihat, tetap melayani soalan para wartawan tempatan dan asing sehingga setiausaha akhbarinya Zakaria Wahab mengakhirinya dengan berkata: "Terima Kasih."

Ketika ditanya apakah Belanjawan '98 itu dianggap "perit", beliau berkata: "Ia bukan sebenarnya perit tetapi kita telah menikmati keadaan begitu baik untuk sekian lamanya. Jadi, ia mungkin menyebabkan keadaan tidak selesa sedikit."

Dr Mahathir berkata belanjawan kali ini tidak seperti belanjawan pada tahun-tahun lepas.

"Selama sembilan tahun kita mengalami pertumbuhan ekonomi yang baik. Tahun ini kita menghadapi masalah kejatuhan mata wang.

"Dan daripada apa yang dikatakan oleh Menteri Kewangan bahawa fundamental (asas) kita cukup baik dan tak ada sebab kenapa ada orang yang kononnya kurang yakin tentang ekonomi kita sehingga menyebabkan kita mengalami kejatuhan mata wang," katanya.

Ketika ditanya apakah langkah dan strategi yang diambil oleh kerajaan dalam mengatasi masalah kejatuhan nilai ringgit, Perdana Menteri berkata: "Strategi itu ada tetapi orang yang menekan mata wang ringgit ini tidak peduli mengenai strategi kita atau kedudukan sebenar wang kita atau fundamental kita kerana mereka mempunyai kepentingan lain."

Dr Mahathir berkata sukar untuk mengawal sistem dagangan yang sedia ada yang dibentuk oleh pedagang nilai mata wang sendiri.

"Mereka ini boleh mengadakan ringgit yang banyak untuk mereka jual dalam pasaran. Sebagai contoh, kalau mereka mempunyai US\$1 bilion, mereka boleh pinjam daripada bank dengan 20 bilion. Dengan wang yang banyak ini mereka boleh beli atau pinjam ringgit yang dimiliki oleh warga asing.

"Mereka ini akan pinjam dan jual ringgit dengan harga yang murah. Dengan ini nilai ringgit pun jatuh dan wang yang ada pada mereka ini lebih besar daripada pendapatan negara kita dan negara-negara lain.

"Sebab itulah nilai ringgit jatuh. Bukan ada sesuatu yang lemah dalam ekonomi negara kita," katanya.

Ketika ditanya sama ada keadaan itu (kejatuhan ringgit) akan berterusan, Perdana Menteri berkata selagi kumpulan orang berkenaan bebas membuat dagangan mata wang tanpa kawalan, tidak ada sebuah negara membangun yang terselamat.

"Mereka itu akan mengambil untung dari sesebuah negara, jejjaskan

ekonomi negara berkenaan dan setelah untung banyak, mereka pindah ke negara lain," katanya.

Apabila ditanya mengenai keputusan kerajaan menangguhkan projek-projek mega seperti projek hidroelektrik Bakun, Dr Mahathir berkata: "Yang jelasnya, kita ada wang...kita boleh teruskan projek-projek ini. Projek-projek ini besar dan semuanya projek prasarana.

"Tetapi sebagaimana anda tahu, sekiranya saya kata yang kita akan teruskannya apabila kita ada wang, dengan segera ini akan menjadi alasan untuk menyerang matawang ringgit dan pastikan kita tidak boleh mendapatkan wang itu. Saya tidak tahu apa yang mereka dapat."

Menjawab soalan mengapa bertukar kepada teknologi maklumat (IT) sedangkan ekonomi negara tidak begitu baik, Perdana Menteri berkata: "Yang sebenarnya kita tidak ada pilihan. Kita sekarang mempunyai kekurangan pekerja dan untuk meningkatkan ekonomi dan menambah pendapat rakyat, kita perlu bertukar kepada IT.

"IT lebih berasaskan ilmu. Pendapatan dan nilai tambah yang diperolehi lebih besar dan oleh itu ekonomi akan bertumbuh tanpa perlu mengimport pekerja asing lagi," kata beliau. -- BERNAMA

NZ WAT